



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Asia Qualifiers: Rhythm Sangwan-i bronze medal angu

Papua New Guinea nung state of emergency sangdong

VOL. XXI NO. 89 (ADOK 89)

DIMAPUR

ROGONÜ (FRIDAY)

ANJETI (JANUARY) 12, 2024

₹ 5.00



Scan for more information

Hamara Sankalp Viksit Bharat

Modi Sarkar ki Guarantee

Tetsürtem peisasa inyakba agi peisasa nokdaktetba

Self-help-groups nung tetsür crore 10 dak tali denogo ; Tetsür crore 2 Lakhpati Didi kümdaktsütsü nangzüker



Mokokchung-Chare lenmang shibanga atar

Dimapur, Aenjeti/January 11 (TYO): Nagaland state nung Dikhu ayong ajanga Mokokchung nungi Chare tashi tang aliba single lane lenmang ulushitsü yanglushitsü mapa UNC Construction Co. Pvt. Ltd ajanga inyaker aser yakta nunglum/longren nungi ali tuzükba maparen inyak tenzüka machine balala aser tapoktsü osettem amshitsü, ta Deputy Commissioner, Mokokchung, Thsuvisie Phoji,

NCS sangdong ka ajanga ashi. Senzüsemponger takum lendongi meyoki aser timtem majurutsü aser mapa tetsükdaktsü makai junga inyaktetsü mechi shia aliba Mokokchung nungi Chare tashi Dikhu ajanga (shortcut) senzüba lenmang ya merenem tashi/tarutsü nung sangdong ka magütsü tashi January 12, 204 nü nungi shibanga atar, ta sangdong ajanga ashi.

(Maneni tapak 8 nung...)

Mkg police-i 2023 küm ken o balala 113 registered asü aser nisung 192 apu

Mokokchung, 11th Jan (TYO): Mokokchung district nung yaküm 1st January 2023 nungi 31st December, 2023 tashi nung ken o balala atalokba aser itemji takok ngua inyakba indang osang tejangja ka Mokokchung Superintendent of Police Mokokchung kübok Media Briefing Cell aser Public Relation Officer-i osang ka ajanga metetdaktsü.

Küm ka tsüngta nung ken o balala züluokba (cases registered asüba)-ji 113 aser ken o balala nung nisung apubaji 192 liasü, ta osang ajanga metetdaktsü.

Nisung tepsetba dak sentakba ken o - 3, tashiyim agi rakzükratempa ken o - 5,

ashioktsüba/külakoktsüba ken o - 3, criminal trespass ken o - 10, auyaba ken o - 4, criminal breach of trust ken o - 1, gari lendong dak sentakba ken o - 6, yirutsüba ken o - 7, tetsür dak sentakba (outraging the modesty of a woman) ken o - 2, IPC sections dak sentakba indang - 2, Arms Act ken o - 6, NDPS Act dak sentakba ken o - 32, NLTP Act dak sentakba - 30, NSR Act dak sentakba - 1, aser Explosive Substance Act dak sentakba ken o - 1 ta ajak senteper 113 ken o registered asü aser nisung 192 apuba police osang tejangja lemsatep.

(Maneni tapak 2 nung...)

Watiyimnung 24 Buba TKM Triennial General Conference agidagi

Mokokchung, January/Aenjeti 11(TYO): 24 Buba Tsürangkong Kaketshir Mungdang Triennial General Conference, January 10 nungi tenzüka "Teperang Tarutsü Nubusen (Radiant Posterity)" omen nung ajemdaker Watiyim yimtak agidagi aser January 12 nü tembangtsü.

January 11 nü saisapong tenzük aser iba sentong nung alakteta jaoker Chairman NEPED, Government of Nagaland, Wb.Supongmeren Hoki liasü aser pai sentong nung mapang tatsüka agia jembidang kaketshir mungdang ka ayongzüka adenshir kelen shisaliokbaren nung dang rangloker amungba kisung masü saka saisapong dena agiba ajanga lanurtemi lena ajaklen tangazükba nguteter ta ashi.

Alakteta jaokerisa saisapong ajanga telongjem, yimjung aser mapa tajung aika inyaktetsü akoker, aser ibaji ajanga takum aziüka temang shia aser tanela ajak temsüa kümdaktsür, anungji iba mungdang akadang saisapong nung shilem agiba ajanga iba temoatsüji agitetsü merangang ta asayarterm ajungshia ashi.

Tsürangkong Kaketshir Mungdang tir Sp.Imlisünep-i ashiba agi iba mungdang nung Units 8 nungi nübo 300 adenshia kanga dang tangazükba balala ngua agidagi.

Iba mungdang nung shisatokden agiba aser sentong nung onük balala jembiba nungi aser saisapong nungi tangazükba tulu ngua temoatsü agitsü tamang tulu akar ta pai metetdaktsü.

Free Movement Regime agreement wazüka ayutsüla: GNF

Dimapur, Aenjeti/January 11 (TYO): Global Naga Forum (GNF) ajanga Government of India dang Myanmar den Free Movement Regime (FMR) tezüngzüktep agia aliba ama inyaktsü ajungshir, ta sangdong ka ajanga ashi.

Iba tezüngzüktep agienba ajanga India sorkar ya international law nung aser Naga nung civilian tem pei tasoli nung tenokdangba makai senzüba human rights nung aibelener asütsü. Onok Naga nung temeden aser par tetsü-tebou mapang nungi kibur süa aruba ali nung temeden asoshi nokdaker, ta GNF sangdong ajanga ashi.

Linük anaporng nung akhi mapang nungi Naga nung lia aruba puti otsütem lir, anungji Indo-Myanmar arütsü alema senzüba ya Naga nung akhi mapang nungi liasü.

1953 küm ato kilonser Jawaharlal Nehru aser U Nu nati Naga nung temelaba makai linük ana tsüngta arütsü ala, parnok telemtetba ajanga international border nung Naga nung aser parnok ali nisungi sadang, ta ashi.

Linük ana indang sorkari Naga nung mali ama parnok sadangtsü telemtetba agia Longwa yimda ama India aser Myanmar nati Naga nung kibong ka indang ki tiyongi sadangtsü nung Naga nung kechi ashitsü? Naga nung shinga talenba kübok malitsü ta pei temeden asoshi nokdak aser yimtenren tsütsü pei sasa telemtetba agia yimsü asütsü akhang, ta GNF ajanga ashi.

Yangnungjagi Indo-Naga tesendaktep tamajungba kuma mitkar temi tashi amshi, nok-nü amer nokdak, ceasefire nung tamakok ajuru, azüdokshi,

extra-judicial military law (AFSPA) benok, yimjung asoshi jembishinü tenzü, nangzüka raksa aser agreement tem terenlok makai anendak ta ajaki meteta lir.

Item ajakji aser taliang ajangshia arur ano tang India sorkari Myanmar den Free Movement Regime agreement agia aliba agientsü sentong atonger, koba ajanga Naga nung kati ka semdangba-a aibelen mapa inyakba ama kümdaktsüba kisung masü saka sobaliba aser loktiliba tsütsü sendaktepsü kanga tasak akumtsü aser arütsü alema oa nungdakba mapang kati ka yaritsüa khenyongi tamakoktsü akumtsü, aser ibaji ajanga alima otsü nung India jenjang tajung nung nokdaka aliba amajok akumtsü, ta Global Naga Forum ajanga ashi.

(Maneni tapak 8 nung...)

Mokokchung nung mezüngbuba "Mega Job Expo" akatsü renemer



Mokokchung nung "Mega Job Expo 2024" sentong dak sentakba nung osangbener senden ka Mokokchung DC conference hall nung akadang tangokba noksa nung angur. Mokokchung, 11th January, 2024

Mokokchung, 11 Jan (TYO): "Mega Job Expo 2024" ta sür mapa inyaktsü maongka bushirtem atema sentong ka tan January ita 30 & 31 anogo ananü Fazl Ali College, Mokokchung nung akatsü renemdaki. Iba sentong "connecting careers" omen dak rangloker akatsü aser ibai Mokokchung District Planning & Development Board (DPDB)-i achayanga katsür, ta Jan 11 nü Mokokchung Deputy Commissioner, Thsuvisie Phoji NCS-i osangbener senden ka DC conference hall nung akadang metetdaktsü.

Iba sentong ya tongtibangsa lanurtem nem mapa inyaktsü maongka lapoktsütsü nükjidong nung akar. Iba sentong nung India tesem balala den state aser international tashi nungi company

asur industry-tem (mapa agütsürtem) balala arua shilem agitsü imlar, ta Mokokchung DC-isa metetdaktsü.

Iba sentong ayongtettsüsa Mokokchung nungi adokba yimsüsür (legislator) parnok 10-i nungitba den ano iba maongka ya Mokokchung nüburtem dang masü saka Nagaland nung aliba Naga nung ajak nem lapoktsür, anungji, tejangrartemi iba maongka agitsü asoshi Mokokchung DC-isa ayongzüka metetdaktsü.

Iba sentong ya Mokokchung district nungbo mezüngbuba akar aser ibai Mokokchung nüburtem asoshi maongka tulu lir, anungji, liso nisungtem nungi amalitep nungdaker aser shilem agitsü ayongzüker, ta Mokokchung DC-isa mepishia metetdaktsü. Iba sentong ya tarutsü nunga

maneni kayonga aotsü merangtsü, ta paisa shisem.

Tejangrartemi <https://connectingcareers.org/> ajanga registered sütetsü mesüra item mobile number +918730865974/ +918257046496 ajanga tayongertem tongtettsü.

Iba sentong ya tongtibang nükmén asem - mapa bushirtem atema, business inyaktsü jangrartem atema aser tejangrartem pei sempet/ashimetet sayutsü asoshi maongka lapoktsütsü nükjidong nung akar. Anogo ananü iba sentong akadang senotsü tsütsü shisatokden den ano liso business inyakertem nem stalls balala lapoka parnok chiyungtsü aser osettsüset ayoktsü maongka lapoktsütsü, ta tayongertemisa metetdaktsü.

Poanglüm Mini Hornbill benjung tenzükogo



Parade Ground Tuensang nung January 11 nü Poanglüm Mini Hornbill Festival nung Deputy Chief Minister T.R Zeliang-i o jembiba noksa nung angur.

Dimapur, Aenjeti/January 11 (TYO): Poanglüm Mini Hornbill Festival 2024 January 11 nü Parade Ground Tuensang Town nung tenzükogo. Iba benjung ya January 13 nü tashi agitsü. Taküm Poanglüm benjung ya "Shensing" omen nung ajemdaker agidar.

Benjung lapokba sentong nung Deputy Chief Minister, T.R.Zeliang tongti tesemdang liasü.

Benjung nung o jembiba mapang Zeliang-i Chang nung ajak den Poanglüm benjung salem lemsatop aser Poanglüm ya Chang nung benjungtem rongnung tulutiba ka lir aser benjung mapang süngkong atsüba sentong ya Chang nung yongtsü nung telongjem aliba temaitsü lir, ta ashi.

Tongti tejaokerisa, Naga

nunger kaka ama nisung ajaki aser talisa lanurtemi asen sobaliba aser libaliro ajungkettsüla aser iba benjung ya asen takar sobaliba sayutsü atema sabang tajung ka lir, ta ashi.

Nagaland sorkari kin ajak dang asen sobaliba aser libaliro ajungkettsü aser tajungba kümdaktsütsü atema Mini Hornbill ayongzüka agitsü ajungshir. Nagaland nung Hornbill benjung amungba ajanga Naga nung yongtsü nung telongjem tali adaokdaktsür aser iba ya sobaliba aser modernization na loktepba international sentong ka lir ta, pai ashi.

Paisa, Mokokchung nungi Tuensang tashi two-lane lenmang tang teyangludak lir ta shia, iba mapa takok ngua aotsü


atema ali aser kiojen atema temenok agütsüba dak sendakba nung tribal Hoho tem aser village council tem longjemtsüla, ta ashi.

Sentong nungsa Deputy Commissioner, Tuensang Lithrongla Tongpi Rutsa aser benjung host Lima Onen Chang MLA natia o tatsütsü jembia liasü.

Maneni sentong nung Khongdang, Naga Go- Karting race, log drum Pulling, Ngangpong yimtsüung nungi folk fusion aser Poanglüm Marathon nung amala sentong balala agia liasü.

Benjung mapang CBLT-i temesepba mozü dang ma ta ashitsü asoshi campaign ka aser TTC-i plastic takok tashi tajemba amshitsü asoshi campaign ka ayongzüka liasü.

59buba Pochury Student's' Union general conference agiogo



January 10 nü Meluri Village Council Hall nung 59buba Pochury Students' Union General Conference nung Advisor, Z. Nyusietho Nyuthe-i o jembiba mapang tangokba noksa nung angur.

Dimapur, Aenjeti/January 11 (TYO): 59buba Pochury Student's' Union general conference January 10 nü Meluri yimtsüung Council Hall nung agiogo.

Iba sentong ya "Honoring the Past, Celebrating the Future, Embracing the Future" omen nung ajemdaker Müluori Küchienyiri Kügharü (MKK)-i ayongzüka agia liasü.

Conference lapokba sentong nung Advisor, New & Renewal Energy and NSDMA

Government of Nagaland Z. Nyusietho Nyuthe alakteta jaoker liasü.

Sentong nung o jembiba mapang Nyuthe-i, nisung taküm ka takok tajung ngua aotsü asoshi nendaka inyaktsüla, peisasa dak temulung lemtettsüla aser mapang amshi ashitsüla ta ashi.

Paisa, shirnoki peisasa yarir parnokji Tsüngremi yarir ta ashi. Memerangdangi nisung kati takok mongutettsü, ta pai shisem. Maneni pai, competitive

tatidang atema jangra aliba kaketshir ter nem couching class balala atema pai senotsü teyari agütsütsü, ta tenangzüka agütsü.

Sentong nung tir NSF Medovi Rhi-i, Pochury Students' Union den salem lemsatop. Iba sentong nung SEND Choir-i ken tajung ka tena liasü. Pochury Student's' Union general conference ya Pochury Students' Union Women Co-ordinator Elizabeth Pojar lenisüba nung agia liasü.

Mkg police-i 2023 küm ken o balala...

(TAPAK1 NUNGI...)

Ozüngi memelaba mozümora apuba yamai liasü – brown sugar gram 353.81, spasmo proxyvon capsules 2951 aser NOVOCOFF-CT cough syrup bottle – 8 aser Alprazolam Tab – 7, item apuba mozümoratemji jenjang asadanga lakh 10 shi adoker. Iba den temesepba yi apubatemji

yamai liasü – MC rum 14,233 bottles, Whisky 786 bottles, beer can 3364 aser itemji jenjang asadanga 85 lakh shi adoker, ta police osang ajangasa ashi.

Arms, ammunition aser explosive dak sentakba apubatemji yamai – Arms: .32 ka den magazine - 3, AK series rifles – 2, .38 pistol

- 1, 12 bore gun - 1, .22 rifle – 2 aser .22 pen pistol – 1 ta liasü. Ammunition: 7.65 live rounds – 15, 7.62 live rounds – 64, .22 live rounds – 49 aser .32 live rounds – 1 ta liasü. Tapokba (explosive): crude bomb – 1, gelatin sticks – 104, detonators/caps – 47 aser fuse wire – 32 liasü.

Kohima DC-i NGO tem senden ayonger

Dimapur, Aenjeti/January 11 (TYO): Deputy Commissioner Kohima, Kumar Ramnikant-i, NGO tem den January 17 nü 11:00 ako nungi tenzükä DC Conference Hall, Kohima nung senden ka amentsü ayongzüko. Kohima nung January 26 nü 75buba Republic Day amungba mapang NGO temi Homes/Institution tem sendangtsü aliba dak sendakba nung sensaksemtsü asoshi iba senden ayongzüko.

NGO tem dang senden nung tamakok maludaktsüi arua shilem agitsü mepeshia metetdaktsüogo. Tejaokertem rongnung, Nagaland Contractors & Suppliers Union tir, Pulie Badze Club tir, Lions Club tir, President Royal Club tir, Classic Club tir, Rotary Club tir, Gorkha Public Panchayat Kohima tir, Hindu Kalyan Samithi Kohima tir, Indian Red Cross Nagaland State Branch tir Kohima Chamber of Commerce & Industries tir densema lir.

Meisen Jamir nem 'design project' tajungtiba sempet agütsü



National Institute of Design, Ahmedabad nung taküm küm renemertem rongnung Kongru Meisen Jamiri ' design project ' tajungtiba sempet agizükba noksa nung angur.

Dimapur, Jan.11 (TYO): Tang National Institute of Design, Ahmedabad, Gujarat nung zünga renemertem rongnung 'project' tajungtiba inyaktetba sempet 'Shanta Keshavan and N Keshavan Endowment Award' Chuchuyimlangtsür Meisen Jamir nem agütsüogo. La ya Wb.Tali Jamir aser Wt.Atula Wai na jala lir.

nem India nung Aadhaar amshitsü sentong yangluletsang Wb. Pramod Varma-i agüja liasü. Iba sempet nung sen senpeta lakh ka dena lir.

Taküm küm National Institute of Design, Ahmedabad, Gujarat nung renemertem nem tetushi aser tazünga nung takok kuli agütsüba 43 buba sentong nung iba sempet ya Meisen Jamir

Iba sempet agütsütsü asoshi National Institute of Design nungi taküm küm renemertemi inyakba mapatem tendangertemi ashiba agi, Meisen Jamiri inyakba "Ladakh Diaries" project nung ya lisopurtem sobaliba aser ayak reprangtetsüsa enoka lir aser itemji tanü putu den putepa amshitetsüsa yanglua lir. Ibai tanen makai kanga nendaka inyakba mapa ka lir ta tetendangertemisa kuli agütsü.

Aboi nung Anganwadi Centre lapokogo

Dimapur, Aenjeti/January 11 (TYO): Aboi ICDS Project kübok Aboi 'A' indang Anganwadi Centre (AWC) ki January 9 nü Tosheli Zhimomi, Director, Social Welfare Dept-i lapoktsüogo. AWC ki ya Langsa Hills Welfare Society, Lampong, Sheanghah, Mon-i tenla agüja yanglutsüogo.

Anganwadi Workers tem coordination senden ka mena liasü.

AWC ki lapokba sentong nung Director-i iba tenla tajung agütsüba atema tetenlar dang kanga pelaba lemsatop. Phuleshe Yepthomi, Addl. Deputy Commissioner, Aboi, shiba iba sentong nung dena liasü, pai Field Official aser Anganwadi Worker (AWWs) tem dang parnok mapa nendaka inyaktsü ajungshia liasü.

Senden nung Tosheli Zhimomi-i, ICDS program benokba nung Anganwadi Worker temi koda tongtibang shilem agir, iba indang lemsatop. Laisa, parnok dang pei mapa bendanga agüja nendaka inyaktsü aser grassroots level nung tanga Line Department tem den longjem inyaktsü ajungshia liasü.

Iba ki lapoktsüba sülen Director aser Social Welfare Dept kübok tanga ketdangsurtem den Aboi aser Tobu ICDS projects nungi

Iba senden nung Social Welfare Dept ketdangsur tejen temi, ICDS kübok sentong balala indang AWW tem nem metetdaktsü. Iba senden ya Amilo Yanthan, CDPO, Tizit lenisüba nung agi aser Tsalito Sangtam, DPO, ICDS Mon-i lokti pela agizükba o jembiba den Hemping, CDPO Tobu-i tepela o jembia liasü.



January 11, 2024 nü Shimla nung Himachal Pradesh electricity board nung inyakertemi Old pension scheme takhangba agüja longkak aitdang tangokba noksa nung angur.

Myanmar nunger sepai 416 India telungi aitogo: Manoj Pande

New Delhi, Aenjeti/January 11 (Agencies): Myanmar nung sepaitem aser lisopur teloktem tsungda raraba ajanga Myanmar nunger sepai 416 shi India linük telungi aitogo, ta Brihostibarnü Army tongti, General Manoj Pande-i metetdaksü.

Paisa, India nunger sepaitemi item tatalokba ya mita repringdar, ta metetdaksü.

Army Day atongsü mapang ana nung lia osangbenertem senden ka nung jembidang, General Pande-i, India-Myanmar arrtsülen tensa ya tebilemsü onük ka kumogo aser Myanmar linük arrtsülen telungpur telok kari Manipur telungi aittsü meranger, ta metetdaksü.

Myanmar nunger sepai 416 bo India telungi aitogo, ta pai ashi.

Myanmar nung lisopur teloktemi longjemer tongtibang jila aika agiadokogo aser item jilaji teimbaka Myanmar arrtsülen lir; iba ama tensa ka ajanga Myanmar nunger senso aika Mizoram state nung jenoka alitsüsa aküm.

Manoj Pande-i, "Iba (India-Myanmar arrtsü) tensa ya asenok ajak atema tebilemsü onük ka lir. Tesüiba ita ana shia Myanmar Army aser lisopur telok balala aser PDF (People's Defence Forces) sepaitem raraba nenoki meteta alitsüsa akok," ta ashi.

"Tanü tashi nung Myanmar nunger Army 416 India telungi aitogo aser iba linük nungjagi civilian aika Mizoram aser Manipur na nung jenoka lir," ta pai metetdaksü.

"Iba denji külemi onoki Manipur tensa-a mita

repringdar," ta pai ashi.

India-i Myanmar den arrtsülen atsü tashi itshtsü atema bilemdar; onoki India-Myanmar arrtsülen sepai tali yoksemogo. Yangji Assam Rifles battalion 20 shi yoka lir, ta pai ashi.

2021 küm February ita nung Myanmar nung sepaitemi democracy sorkar atsüngdokba mapang nungi tenzüka lisopurtemi linük nung democracy sorkar amenoktsü takhangba agüja longkak aiter aser lisopur telok balalai longjemer sepaitem den raradar.

India kidanger Myanmar aser India na arrtsüji kilometer 1,640 lir aser item arrtsü jagi Nagaland aser Manipur na densema state aika kongshir.

Taoba ita India-i Myanmar sepai aser lisopurtem tsungda rara anentsü ayongzüka liasü.

Mamata-i 'One Nation, One Election' anema luden dangi shidi zülu

Kolkata, January 11 (Agencies): Trinamool Congress tongti lenir aser West Bengal Chief Minister, Mamata Banerjee-i 'One Nation, One Election' anema taoba mapang linük Tir, Ram Nath Kovind-i aniba committee dangi shidi ka züluogo.

General election aser state elections külemi dang agitsüji tamakoktsü, ta shia Mamata-i 1952 küm mezüing elections külemi agiba metetdaksü.

Mamata-i, state tem dang kümsük mabensadangyongi assembly elections agitsü tuyuba ajanga nüburtem tamang

mekoktetsü, kechiyong nüburtemi assembly nung züingsemtemji kümsük küm 5 abensaa inyaksü atema shim, ta metetdaksü.

Laisa, "Central mesüra state sorkari kuli balala ajanga kümsük tembanga meinyaksüsa akok. Tesüiba küm 50 tsungda anojungi Lok Sabha aiben anena liasü," ta ashi.

West Bengal Chief Minister-isa, general election aser state elections mapang balala nung agiba ya Westminster system ama lir anungji iba ya memelenshtsüla, ta ashi.

Laisa, elections mapang

balala nung agiba ya India linük temzüing inyakyim nung lateta aliba ama lir, ta ashi.

'One Nation, One Election' onük nung nüburtem tangatetba metettsü atema Ram Nath Kovind-i aniba committee-i January 15 tashi nung parnok den tebilemba lemsateptsü nüburtem nem metetdakja lir.

Yaküm September ita nung high level committee tentetba sülen tang tashi nung parnok senden anaben menogo. Tawa committee-isa shidi ajanga yimtenren party tem dang anogo ka shimteter iba onük nung shisa lemsateptsü metetdakja lir.



January 11, 2024 nü Srinagar nung Congress lenir Meem Afzal den party lenirtemi 'Bharat Jodo Nyay Yatra' indang kaket sayatsüdang tangokba noksa nung angur.

India nung yimti temerüktibaji Indore lir

New Delhi, January 11 (Agencies): Taküm agi küm tenetbuba atonga India nung yimti temerüktibaji Madhya Pradesh nung commercial capital, Indore lir.

Brihostibarnü Union sorkar indang cleanliness survey sangdongogo.

New Delhi nung sentong ka nung Madhya Pradesh Chief Minister, Mohan Yadav-i linük Tir, Droupadi Murmu ket nungi 'cleanest city' award agizük. Iba sentong nungji state urban administration minister Kailash Vijayvargiya aser Indore civic chief Harshika Singh nata liasü.

Yimti temerüktiba award anguba atema Chief Minister Yadav-i Indore nung alirtem nem tenüngsang agüja, merükmejuba ya parnok melungjang nung shilem ka kumogo, ta ashi.

Iba award anguba atema Indore Mayor, Pushyamitra Bhargava-i Ram nem tenüngsang agütsüba den külemi 'merükmejuba dak sendakba nung iba yimti ya India atema dang masü saka alima atema tatishitsü tajung ka kumogo' ta ashi.

Kasa survey nung telemsa

balala nung yimti 4,400 asadanga liasü.

'Service Level Progress' kübok jana bendenba, process asüba aser jana tapu balala indokba nung Indore-i mark 4,709.40 angu, ta Swachh Bharat Abhiyan atema Indore Municipal Corporation's (IMC) nung consultant, Amit Dubey-i metetdaksü.

Paisa, Indore yimti single-use plastic nokdangba aser '3 R' (reduce, reuse aser recycle) centres ajungkettsüba, sü agi yangluba bags dang amshiba aser jana agi tagitarutsü kuma amshiba ajanga jana kanga ajema kümdaktsüogo, ta metetdaksü.

IMC ketdangsertemi ashiba agi, yimti nung kibong lakh 4.65 aser commercial establishment 70,543-i tesem balala nung jana bendener; anogo shia jana tai touzüik ton 692, jana takong ton 683 aser plastic jana ton 179 bendena indoker, ta metetdaksü.

Parnokisa, yimti nung jana indokba gari 850 amshir aser item gari nung jana tapu balala bendanga abentsü atema compartments lir, ta metetdaksü.



January 11, 2024 nü London nung India Defence Minister, Rajnath Singh aser UK Ato kilonser, Rishi Sunak na senden amendang tangokba noksa nung angur.

India ya gari yangluba tiyongtsü kümdaktsütsü nükjidong lir: Gadkari

Gandhinagar, January 11 (Agencies): Sorkar mission ji India ya alima nung gari yangluba tiyongtsü ka kümdaktsütsü atema lir, ta Brihostibarnü Union Minister Nitin Gadkari-i ashi.

Gandhinagar nung Vibrant Gujarat Global Summit indang seminar ka nung jembidang Union Minister-i gari yangluba industry nung lenirtem dang electric gari ama technologies nung sen indoka inyaksü ayongzüik.

Ato kilonser Narendra Modi-i India rongsenkettzüing US dollar trillion 5 kümdaktsütsü aser tangar dak memetaloki aliba linük ka kümdaktsütsü nükjidong lir, ta shia Gadkari-i, "Onoki gari yangluba sector ya sen 25 lakh crore industry kümdaktsütsü nükjidong yur inyaker," ta ashi.

"Asenok ya alima nung temaba jenzang akümstüla. Onok mission aser nükjidongji India nung gari yangluba industry ya alima nung gari yangluba tiyongtsü kümdaktsütsü atema lir," ta ashi.

Gadkari-i, pa minister akümba mapang nung India nunger gari yangluba sector ya alima nung jenzang 7 buba nung ang liasü, ajisüaika Ato kilonser Modi lenisüba kübok tangbo asenoki Japan-a ajangteta alima nung jenzang 3buba kumogo, ta ashi.

Tang India nung gari yangluba industry ya sen 12.5 lakh crore lir, ta pai ashi.

"Iba industry ajanga bendanglen nungi sen 4 lakh crore angur aser iba industry ajanga mapa crore 4 adokdaksüogo. Iba industry ajanga GST saru nungi state sorkartem aser Centre sorkar nem saru jenti agütsür," ta paisa metetdaksü.

Paisa, tesüiba küm ishika tsüingda India nung electric vehicles (EVs) yangluba kanga renlokogo aser iba technology nung sen indoka inyakertemi tajangzüik kanga ngudar, ta ashi.

"EVs nung sen indoka inyang, mesüra nenoki maongka magitetsü," ta paisa shisem.



TIR YIMYIM YIMOBILEM (EDITORIAL)

DIMAPUR ROGONÜ, JANUARY (AENJETI) 12, 2024

Asenoki inyaktsübo makli !

Sen meyirjang metsü agia yimti yimdong aokba mapa inyaktsü agibo sen meyirjang pungo chia office-ang ka nung inyaknuba shisatsü aser tangatetba aliba purtemji asenok lir. Kasaji sen meyirjang ter agia yimdong nung tangar ajaki ngua mapa ka inyaka alitsü agibo, tangar dokan ka nung sen meyirjang pezü agia inyaknuba jakla aser temulungjang adenertemji asenok lir. Aji oda, oset tilateri yoka jajatsü agibo kidangang tsüraburtem nem mesüdakja mobile amshia kazütsü jangraba chirnurtemji asenok lir. Iba ama tangatetba tila jagi asenok alena ayur aser kechi mapa südirsüaka nümadangdanga khen inyak nung taküm piyong jangratema pei taküm aser pei mapa agi nümadangdanga alitsüba ser nung, asenoki asen nungdak peria angutsüba mapatem inyaktsübo nüma madangba agi taküm piyong nüma medangtetsüsa alir. Aji oda, asen khu aseni aben nungbo sen meindoki tadongtsü ka atongtsü ser nung tangar nem sen agütsür bendaktsüba agi asenok taküm ya teti matong ali nung temdok amai dang alir. Bilemdangdi süra, asenok kecha mapa maka ama kilong takdang nung smart phone nung tangari tapu tapu enoktsüba repranga kazüdang, asenok meyong kiojen yanglutsüba osettsüset ajak tangar nem sen agütsür belenokdaktsüba yimya ya-ang taaktsü mapa ka lir. Aji oda, sünga tangar nem sen agütsür sudaktsür aser tzüa tangar nem sen agütsür tadaktsür. Kidang asenokbo temeyonga meküraktsü, kechiyong asenok chiyongtsüa makayonga kidang mapa inyaker kilir yua lir. Iba jagi akhidangbo mapa tali inyakba agi temang ajak raksaa tashidak inlok saka tanü asüngbo mapa meinyaki kazüba agi menaba tashidak tapu balala agi shiranger teimba kümogo. Iba ama tangatetba tai agi sensakba tia nungi anitetsü atema akhidang nungi kaketreju aser lokti senden sentongtem nung "Dignity of Labour" indang jembia aru. Ajisüaka, asenoki 'dignity of labour' tetezü ya mapa meranga inyaktsü ajungshir amai angateter. Ajisüaka, ibai asenok dang kechi mapa inyakdir inyakaka, pei mapa agi pei nümadanga aser temulung süsüa inyaktsüba indang tangatetba ka agütsüner. Atangji, mapa meranga inyaktsü tangatetba aser temulungtetba asenok dak alitsüla saka mapa meranga inyakba kisung agi asenok nungdak meperitsüa akok. Meranga inyakbaji mapa inyakba nung shilem ka dang lir. Aji oda, mapa nung temoatsü aser tajangzük keta inyaktsü asoshi asenoki inyakba mapa nung asenok nümadangdanga aser nendaknendaka inyaktsüla. Asenoki kechi mapa inyakdir, iba jagi tangar mulungjang ajungmesotsüsa asenoki inyaktsüla. Tsümaribo anüngdang süngo molua bener office aser mapa inyakba tesem sema yoka jajar. Iba mapaji temerük, tajung aser ayongayonga anogo nung sen noklang pungobo aatsü. Kasaji, asen lima nung süng aser long amshia ayangertem ya asenok ita sen dang nungi teimba angur. Kasaji asen kidang light wire tatsüka otsü nung sen meyirjang dak tali meshir aser tzü pipe tatsüka perepteptsü nunga sen meyirjang ishikaba adoktsü. Ano, kidang rong tepdaktsü nungbo, ajibo asen ita sen rangben agia meperitsü. Tangarbo item mapaji nümadangdanga inyaker, kechiyong iba jagi parnok taküm nungdak peridakja jangratema alir. Asenokbo mapa maka aser mapa mangu kazüba agiang nüma atanger asü ? Sozükli nungi kaketreju nung mezüngtem tashi tsüraburtemi yari aser kibonga tsüraburtem sen agi kümtsü aser kibong kümer külena tsüraburtem nem mesüdaktsür ta aliba taküm agiang nümadangteter asü ? Joko, mapa inyaktsübo maakli saka mapa maka, mapa mangu, mapa meinyak kazütsübjang taaktsüka bilemdi.

OLEMSABANG

Dr. E. W. Clark Arishi Atemba.

~ T. Nüngsang Lkr.

Dr. E. W. Clark tatemsa Aolima nungi pilaa aoba Otsübo asenoki tamalen kasa iba ocet agütsüri Osang kaket nung adoktsüba tejangja nguogo. Anungji tanü yangibo alima nungi pilaa aoba otsü dang tongmelang agi agütsür.

Dr. Clark ya Naga nung asoshi Tsüngremer tatemzük tenyar ka liasü ta ajaki metet. Saka yangi pa taküm otsü masü arishi tempangba indang dang zülur.

Nagalima ano alima tazü tesem ajaklen kin o kinna, yim o yimna mangko agi konang, konang toktepa noka tsüka leptepeba mapang Khristan walunir asen tebo Clark ya Minlu Alusür ama tasü tait agi iba Naga tenem nempuka atua Khristan Osang tajung prokba agi tanübo Nagalima ajunga ayimsüngogo.

Pa taküm nung arishi piyong Tsüngrem tenzüktsü nangzükba aser nükjidong ayuba ama Tsüngremer lu nung tenzükba wadang balala nung, tesem balala nung tenzüka aruba ajak agibo küm 55 liasü.

Talisa, Pa taküm nung Tsüngrem tenzükba talangtibaji Aolima nung liasü. Impur Mission station jungjunga anemteta yutsür joko kodang tashi agi Mission wadang sadema meinyaktetsüsa aküm Dr. James Riley tetuyuba ajanga pa Impur doktsür aotsüsa aküm. Kechiyong arishi piyong Aolima tokong tenem ajak sema tetsüng, tetsüng agi dang senzüa anibelega jajaba agi aiben temang nunga timtem anguba pa otsü nung lir.

Anungji joko Doctori ashiba ama pa tekeratiba nung pei limai (Americai) aotsü mapang agi tonga aru. Pa otsü nungi angazükba agi iba dang tamaa küm ishika tejaklen anisüngzük akir oadoker alitsüba mapang agibo atong, saka Impur doktsür kensa aotsübaji ashiba ama Mission Field jungjunga matem yutsür moutet jerena inyakba kuli sayur.

Aolima nung küm 41 doklanga tenzükter tesülen joko arishi agi memela nung Aolima nüburttem menungrasetta yutsür Impur nungi kensa pei limai aobaji February 28, 1912 aonung ayatrem 1:00 a.m. nung apuso ta jembir. Tokong leman aser Tzüyim nung aodang ita pongu ser tesadang süier August ita tom nungang pei lima America atong.

Tamalen ashiba ama arishi tatemleni aor ta meteta pei lima oa tongerbo talangka meli-i dang St. Florida Mission Hospital nung March 18, 1913 anepdang asü.

Angazükba agi Dr. E. W. Clark taküm atemba otsüji kanga temenungratsüka! Kechiyong joko alima nung nisungi akokba tashi agi yarir tatem nung Taküm aser Tanüla koba Tsüngrem shilem lir ibaji sota meyutet iba anepdang pa yiptenji tepur jungjunga renemtsür pa kinungtsü den Doctortem aser Medical staff ajak pa meketa nokdaker repranga lia temenungratsüka amouzüka ao ta ashir.

Saka tatem nung ya asenoki bilemtetdi:

Dr. Clarki asen tzürapurtem dang ashiba o,

"Asenok kenübosa iba alima nungi pilatsü,

Saka kotak nungbo asenok kodanga mepilatsüsa,

Kenü yangji tepela nung ajuruteptsü."

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Las Vegas nung Arogo kati pastor asüba atema mangyimer



Pastor Nick Davi aser pa kibong noksa nung angur.

January 11, 2024: North Las Vegas, Nevada nung Grace Point Church nung züngsemtemi Pastor Nick Davi asüba atema mangyimer; December ita tatembanglen kiyonger kati pastor Davi khaseta liasü.

Taruba hopta Arogoi pastor Nick Davi bilemteta memorial service ka agitsü aser iba sentong nungji nisung 1,000 shi adentsü imlar.

Tawa sentong ka nung Grace Point Church nung Pastor, Ty Neal-i, "Asenok adianu ka makai kümogo. Asenok pastor ka makai kümogo aser asenok tembar ka makai kümogo. Iba ya asangsang masü ama bilemer. Iba ya pungmang tamajung ka dang mesük," ta jembia liasü.

Neal-isa tamang jenjang indang jembidang Tsüngrem temeim aser taochi den nisung

tajungertem timtemba den medemdanga jembia.

December 29, 2023 nü kiyonger kati pastor Nick Davi khaseta liasü. Kiyongersang jagi mapang shia pastor Davi aser par kibong nem timtem agütsüba ajanga par kibongi mapang tatsüka atema ki toktsür aienshia liasü. Ajisüaka parnok oset kar abeni kidangi meyipa aoba mapang nung kiyonger jagi pastor khaset.

Pastor khasetsang arrshi küm 36, Joe Junio iba tesem nungjisa apu. Junio-i mapang shia Davi'er kibong nem timtem agüja liasü.

Pastor Nick Davi kinüngtsü Sarah Davi bo iba lendong nungjagi jenbu. Lai tasü itta Junio ket nungi pistol rakzüka liasü.

Pastor Davi bilemteta January 15 nü Grace Point Church nung memorial service

agitsü aser iba sentongji Arogo indang YouTube channel nung live sayutsü, ta Arogoi Facebook post ka ajanga metetdaksü.

Neal-i Arogo nung Davi-i tongti shilem agiba lemsatepba den külemi 2005 küm Katrina ta ajaba yipru mopung tesashi agi kongshiba mapang pai tongti shilem agiba aser pai nisung dang masü saka shiruru-a kanga meimba metetdaksü.

Pastor Davi ya Long Island, New York nungi liasü. Pa Riverhead High School nung graduate asü aser University of Tampa nung B.S. in marine science & biology renema liasü.

Grace Point Church-i Arogo züngsemtem dang Davi'er kibong atema sarasademjang ta mepishia metetdaksü aser Davi'er kibong yaritsü atema GoFundMe campaign ka tenzüko.

Khristan yimsü agizükba atema Iran tsür ka küm 6 tepuokdak ayutsü

January 11, 2024: Irantsür arrshi küm 60 tantsür kati Islam yimsü toktsür Khristan yimsü agizükba atema la küm trok tepuokdak ayutsü obendang agütsüogo.

Iran tsür, Mina Khajavi-i 'Zionist' Christianity ajungkettsüba ajanga lai linük security raksatsür, ta la aitsüogo.

2020 küm Khajavi apuba sülen la anema ken o jembia tenzüka liasü aser la anema obendang agütsütsü atema 2022 küm nungi ang ken o angadanga liasü.

2022 küm Khristan yimsü agizüker, Malihe Nazari küm trok tepuokdak ayutsü aser Iranian-Armenian pastor Joseph Shahbazian küm ter tepuokdak ayutsü obendang agütsü.

Shahbazian aser Nazari nabo iba mapang nungjagi tepuokdak ayu saka Khajavi anemabo tang ang obendang agütsür. Gari tsükokba lendong ka nung la tetsüng yiruba ajanga surgery agia merang inoka liasü. La tetsüng agi junga

mejajateti timtemer ajisüaka taküm January 3 nü la dang anogo pongu tsüngda Evin jail-i arung ta tuyua liasü.

Nazari'er jabaso kanga mejungi shirangba ajanga la yaküm küm tetenzüklen chiok aser Islamic Penal Code kübok Shahbazian anema kuli peria manguba ajanga pa-a yaküm September ita nung chiokogo.

Meimchir temeden atema inyakertemi Khajavi-a tangsa chioktsüla ta takhangba agütsür, kechiyong lai Khristan yimsü agizükba ajanga dang la apu, ta ashir.

2021 küm November ita nung Iran nung Supreme Court-i, Khristan yimsü ajungkettsüba aser house-church tentetbaji ozüing alema masü, aser itemji ajanga linük security meraksatsür, ta obendang agüja liasü saka ketdangsertemi maneni Khristante anema inyakker.

Iran linük nung Islam yimsü toktsür Khristan yimsü agizüker nisung 9 house church-i aoba atema küm pongu tepuokdak

ayutsü obendang agütsüba sülen iba ken o angadanga mapang nung Supreme Court-i, house church-i aoertemji linük tsükchirtem masü, ta obendang agütsü.

Supreme Court-i, Khristan yimsü dangi meyipertem house church-i aoba ajanga parnok linük security anema inyakker, ta tai metonglokttsütsüla; Khristan yimsü ajungkettsüba linük security anema inyakba masü, ta metetdakja liasü.

"Khristan yimsü indang sayutsüngiba mesüra 'Evangelical Zionist' telok ajungkettsüba napronglaji kibongtem adenshiba (house churches) ajanga Khristan yimsü ajungkettsüba lir; aser ibaji linük security raksatsütsü atema masü," ta Supreme Court-i obendang agütsü.

Supreme Court-isa, house churches tentetbaji Islamic Penal Code kübok Arrla 498 aser 499 na anema inyakba masü; item arrla ya linük anema nokdakba telok nokdangtsü atema dang lir, ta ashi.

ANOGO ABEN TSÜNGREM DEN

Taküm O

Aser parnok o parnok na jembitepa ashi, lenmang nung pai asenok den jembia Laishiba ratetta sayudang, asenok temulungjang marong ama? Luke 24:32

Yisui Pa nendaka bushir den aden. Nisung ana Emmaus lenmang nung Yirusalem nung atalokba süngmanga jembitepa jaja. Parnok anogo nung atalokba parnok i angatetogo ta bilem saka Yisu asüba ajanga Tsüngremi parnok lima nung inyakba mapa parnok mangatetti aküm. Yisui Messia ta parnok imla saka Pa asüba ajanga parnok süngmang aser tasü meiti aküm. Parnoki telangzüba nungdak.

Tsüngremi temulungjang repranger aser Pai mulungba ochi shia bushir Pa chirtem Pai metetter. Yisui item nisung anasa ao, parnok den jaja aser Laishibai kechi ashir aser kechi atalok aji angatetsü parnok temulungjang lapoktsü. Yisui jembidang parnok temulungjang nung arong. Yisui Lai nungi jembidang parnok kechi ajangshi iba den medemdangdang, parnok Tsüngrem O angar ta parnok mulung nung metetta aru. Parnok terata sama, tepela agi asüng aser parnok tembartem den ochibaji lemsateptsü meyipa aru.

Na tensa tia agi ratadakja lira, Yisui item nisung ama dang inyakba ama Pai Laishiba ajanga ne terata ajak angatetdaksütsü. Nisung tsütsü nungi tiaji tebangkatsü asütsü aser tasü maitsü asütsü aser tasü maitsü asütsü akok. Laishiba ochibaji angatetsü asoshi Yisu atenba nungdaker. Ne tensa mapang agi na ratadakja lir asü? Yisui anguba ama angutsü asoshi na Yisu nungdaker. Nai ken Yisu nungi angashira na item nisung ana ama ya akümtsü, Tsüngremi kechi inyakker iba nung adentsü aser tepela agi nai ajuruba Tangartem den lemsateptsü.

Martin Scorsese-i taküm Yisu indang film tasen ka tangoktsü



Martin Scorsese

January 11, 2024: Oscar award angur film director, Martin Scorsese-i taküm film tasen ka tangoktsü; film tasenba otsübo renemogo aser küm tatembanglen nungi film tangok tenzütsü.

Martin Scorsese-i direct asüba film tasenbaji minute 80 shi asütsü.

Interview ka nung jembidang Scorsese-i, iba project tasenba ya Sh?saku End?-i züluba kaket 'A Life of Jesus' nung ajemdaker yanglu, ta metetdaksü.

Scorsese-isa, Kent Jones tenati film otsübo renemogo aser iba film ya Yisu Khrista tesayubatem tongtibang nung rangloker yanglu, ta metetdaksü.

Arrshi küm 81, Scorsese-i, "Tang nai 'yimsü' ta jembira ajaki nokdaksü, kechiyong

yimsü ajanga lenla aika nung tamakok nguogo," ta ashi.

Scorsese-i, 2023 küm pai Pope Francis ajuruba aser 'The Global Aesthetics of the Catholic Imagination' conference nung adenba ajanga iba film tasenba yanglutsü atema pa ajungmesoa liasü, ta metetdaksü.

Scorsese-i yimsü dak sendakba film aika yangluogo. 1988 küm Nikos Kazantzakis indang The Last Temptation of Christ film sayaba ajanga alima tesem ajaklen iba film ashishia mangatetep adoka liasü. Iba sülen Scorsese-i 2016 küm 'Silence' film saya. Iba film nung Aso 17buba mapang Japan nung Jesuit putirtem reshikangshiba indang sayaa liasü. 1997 küm Scorsese-i Dalai Lama indang taküm otsü film 'Kundun' sayaa liasü.

AO OSHI ANGAZÜKDAK:
TANÜ ANGAZÜKTSÜBA OJANG



Shinük

(n) shi lemyalemkuba nung shilem ka (a portion of shared meat)

* Yimtak shinük agi matartem yimten nung shilem magiteter.

Shio

(n) nabong mesükba arem shiruru (wild goat)

* Shio ya lungbang lungren nung dang senzür.

OLONG PAITEP # 6664

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzuba - (5)

OLONG PAITEP # 6663 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

KHEN SHISADANGDI

2024 KÜM YAMAI INYAK NUNG JUNGER TA ALOKBAI BENDANGER :

- 1. Christmas aser new year sendong nung sannuker kinungtsü tongti O jembitsü nung meinoktsütsü. Pei fellowship nung aküm keta amongtsü.
- 2. Sannuker malidang pei kinungtsü nem pulpit talaktsüka magutsütsü, evangelist tem peria lir. Deacon temi ah melenzüka jembitettsü.
- 3. Father skol aser mother skol nung sannuker, sannukla mesenzü tajungba. Retired Rev. Pastor tem den, training nung oa atener nem nunglojangma. Ajak nenoki dang awashiti asünungbo nenok kanga belemtsü.
- 2. Thursday tetsür sentep sannuker kinungtsü fellowship shia O jembia jajadang sannuker kanga belemer, mapa kar nungbo tamakok alutsüsa akümer, pastor kibong nem timtem tagutsü. Laishir tetsür tajung aika lir. Kokra pei fellowship nung alir nem jembidakjang. Tanga fellowship nungi arurtem Traffic jam nung kanga timtem ajurur . Aji ta mesura, fellowship shia Associate Pastor Women ayu nung tajungba asütsü
- 3. Deobar sannuker fellowship melentepa O jembia tesenzü. Pei fellowship nung tenang. Deobar anogo devotional jibo sannukeri jembibaji sa tajungba.
- 4. Christmas aser new year tanurtemi laishiba azüngba ya ah anenang. Sendong kanga langa agiba ya tajung agi majung akümer. Kokra deobar shia youth aser child department nungi Christmas aser new year nung amato züngdakjangma. Aji kanga agia tajungba asütsü.
- 5. Mother's day, aser Father's day, nungbo senpet tilalabo amshi nung junger. Ashiko next year ajurutsü majurutsü memetet. Arogopur tem ah mongpu metetdaksüdimma. Kanga pelar.

- sms

Imphal court-i tetsür 12 judicial custody nung ayutsü tuyu



Imphal, Aenjeti/January 11 (Agencies): Chief Judicial Magistrate, Imphal West indang court-i Bodhbarnü tetsür 12 anogo asem judicial custody nung ayutsü tetuyuba agütsüogo. Tetsürtem ya social media nung prokshiba video ka dak sendakba nung aitsüogo, kong parnok yagi tetsür ka yipden ka nung rembanga mejangdaksür kanga mejungi azükba nguogo, ta ketdangsürtemi metetdaksü.

Pua aliba tetsürtem ya tawa tentetba sobaliba lokti tentet Huiyel Mamom indang züngsemtem liasü. Tesürtem ya FIR No. 06(01)2024 IPS Under Sections 326/354/506/34 IPC & 66E IT Act, 2000 kübok Imphal Police Station nung ken o ka benokba dak ajemdaker pua liasü, ta police-i ashi. Video nung Aiür ka dak 2023 küm December 31 aser 2024 küm January 1 aonung tetsür kati

taochi makai azükba aser la nem tangartemi teyari agütsüba nguogo. Iba tetsürila ya küm tasen benjung amungba mapang yi jemer liasü. Social media nung ayimsünga prokshiba video nung tetsüla ya nisung kati sung agi kanga mejungi azükba aser tangartemi iba tetsürila tetsüng aser teka ama ataba nguogo. La tekolak aser ku pillow nung rembanga toktsür züka liasü.

GCU nung international conference ka ayongzüka agitsü

Guwahati, Aenjeti/January 11 (Agencies): Guwahati kübok Girijananda Chowdhury University (GCU) indang Azara campus nung yakta international conference ka ayongzüka agitsü sentong yangludar. Girijananda Chowdhury University Guwahati indang Department of English and Foreign Languages-i "Beyond Borders and Boundaries: Indigenous Cultures Now and Then," omen nung ajemdaker International Conference ka ayongzüka agitsü. Iba sentong ya Russian State University for Humanities and Social Sciences (RSUH), Moscow, Russia den longjemer agitsü. Anogo ana agitsü aliba

conference ya 2024 küm January 23 aser 24 nü agitsü. Tetsükdaksü balala ajangshia aoba mapang indigenous sobaliba aser ethnic minoritie tem indang takar sobaliba aser oshitem wazüka ayutsü asoshi koda tongtibang iba indang sensak asemtsü asoshi ibaconference ya ayongzüka agitsü. Conference ayongzüka nukjidongji scholar, academician aser kaketshirtem nem sobaliba balala wazüka ayutsü atema lemsateptsü atema sabang ka agütsütsü asoshi lir aser iba ajanga shisatsü lemsateptsü aoshi maongka agütsütsü. Prof. Alexander Stolyarov, RSUH, Moscow, Russia, Dr.

Indira Gazieva, RSUH, Moscow, Russia, Prof. Abhai Maurya, Former Vice Chancellor, EFLU, Hyderabad, Mr. Ratheesh C. Nair, Honorary Consul of the Russian Federation, Director Russian House, Thiruvananthapuram aser Bangladesh Open University, Dhaka nungi Mizanur Rahman nunger tongti o jembir asütsü. Maneni linük balala nungi faculty züngsem, academician, scholar aser kaketshirtemi iba sentong nung shilem agitsü. Girijananda Chowdhury University-i iba conference nung tongtibang college, university aser tanga institution tem nungi shilem agir 100 ayongzüka agitsü atema renema lir.

Meghalaya: Byrnihat India nung mopung temenentiba yimti kümogo



Byrnihat

Guwahati, Aenjeti/January 11 (Agencies): Meghalaya nung Ri-bhoi district kübok Byrnihat yimti-i Delhi ajateta India nung mopung temenentiba yimti kümogo, ta Centre for Research on Energy and Clean Air (CREA) indang report tasenba ajanga metetdaksüogo. Delhi nung asükwa smog agi kanga kangshir ajisüaka parnok

jenjang tibubai asepzükaluogo. Tang India nung mopung temenentiba yimti tem rongnung Bihar nung Begusarai, Uttar Pradesh nung Greater Noida aser Byrnihat nunger temaba jenjang nung lir. Iba report ya yimti 227 asadanga sülen 2023 air quality data dak ajemdaker agütsüogo aser iba ajanga teblemtsüka yimtitem mopung temenenba

küma aoba sayur. Report ajanga ashiba agi, NCAP yimti 37-i dang annual PM10 targets tongteta liasü, aser kanga tongtibangsa NCAP fund shilem 64 bo awi tajemba kümdaksütsü aser smog guns amala khen atema teblemtsü bentettsü asoshi inyaksangshiba nung intoka liasü. "NCAP tenteter küm pongu sülen non-attainment yimti 131 nungi 44 nung dang source apportionment studies tembangogo," ta CREA analyst Sunil Dahia-i ashi aser iba ajanga sentong junga meyagluba aser nukjidong tejangja ka yur minyakba sayur. Maneni NCAP tema nungi yimti 118-i national air quality standards ajangogo aser iba ajanga sentong ajanga tesem kar dang tongtetba aser inyakyim atsülangshia inyaktüsü nungdakba sayur.

EduVersity PLUS
CSE PREPARATION 2.0

New Year Offer

NPSC FOUNDATION COURSE

@Just RS. 25,000/-

Offer valid till 15th Jan' 2024

Be the Next EAC - DSP - SA of the State

EduVersity PLUS
CSE PREPARATION 2.0

COURSE BENEFITS

FREE

- ANSWER WRITING PROGRAM
- ESSAY WRITING PROGRAM
- GENERAL ENGLISH PROGRAM
- CURRENT AFFAIRS MAGAZINE
- MATERIALS
- MOCK TEST SERIES
- MOCK INTERVIEW

eduversityplus.com | eduversitykohima@gmail.com

EduVersity PLUS
CSE PREPARATION 2.0

PLUS FREE CERTIFIED

COMMUNICATION SKILLS & PERSONALITY DEVELOPMENT CLASSES

with coordinators of

TRINITY COLLEGE LONDON

Join the No.1 Civil Service Institution

+91 7005114715 | +91 7085685569

FILM & TELEVISION INSTITUTE OF INDIA
An autonomous Institute under Ministry of Information & Broadcasting, GOI

ADMISSION OSANG

'One Year' PG Certificate Courses in Television (AICTE approved) nung admission atema application meshir

04/02/2024 tashinung apply süang Examination anogo: **11/02/2024**

Tejangja metettsü asoshi Institute indang website **www.ftii.ac.in** nung angutsü

CBC 22104/12/0003/2324

MENUNGRA BILEMTETER



ASÜR M.TALIWABA JAMIR
TASÜBA ANOGO : 12.01.2023

Kodanga amadoktsü makokba temeim Obala, nai onok iba akümüli lima nungi toktsür orr küm ka junga arudang nü temeim mapa aser otem bilemteta Tsüngrem nem tenüngsang agütsür. Na onok den meliaka nü temeim onok mulung nung teti lir.

-Temeim Chirnur, Semchisemnur aser Kinungertem

Papua New Guinea nung state of emergency sangdong

Port Moresby, Aenjeti/ January 11 (Agencies): Papua New Guinea yimtiba Port Moresby nung nisung telok kati dokan tem rongdokja osettsüset auyar nisung 15 tepsetba sülen anogo 14 atema state of emergency sangdongogo.

Emergency ozüing kübok nüngdakba mapang amshitsü sepaia 1,000 dak tema renema lir ta Ato Kilonser James Marape-i Brehostibarnü sangdong.

Marape-i osangbener senden ka nung ashiba agi, pai linük indang police tekolakba aser finance aser treasury department nung lenirtem khen asoshi anenja lir aser sorkari tensa tenzüka asadanger.

Rasaa meshie itasen ajemtsüba mechi sepaia, police tanishir aser prison guards temi longkak aitiba sülen Port Moresby nung Bodhbar nikongdang nungi mepetmesü tenzüka.

Ghonda ishika tsüingta iba mepetmesü ya linük yimtiba nungi mile 186 shi pilar aliba Lae yimti tonga ao.

Port Moresby nung nisung ti

asü aser Lae nung nisung tenet tepset, ta police temi ashi. Bodhbarnü television footage nung nisung meyirijang aika Port Moresby yimtung nung karbo auyaba oset bener senzüa aliba nguogo. Yimti nung mokozü tanak adoka liasü aser ato kilonser indang office tezülen police indang gari ka nung mi senlokja liasü.

Chinese embassy ajanga ashiba agi, China nunger meyong bussines aika raksatsü aser par senso aika yiru. "Nisung dak azükba, raksatsüba, auyaba aser rongdoktsüba aser China nunger dokan tem densema commercial facilities nungi auya," ta embassy ajanga sangdong ka nung ashi.

Beijing-i Papua New Guinea indang sorkar nem ken o ka benoka lir aser China indang Ministry of Foreign Affairs ajanga China nunger ana tera yiru ta ashi.

"PNG nung aliba China nunger dang tensa melentepba züngzünga reprangshima alitsü nenshia ashir," ta ministry

odongtar Mao Ning-i Brehostibarnü ashi. Tensa azüoktsü mechi sepaitem yoka lir aser tashi sayutsü mechi mitkar indang garitem yoka lir, ta Post Courier osangkaket ajanga ashi.

Bodhbarnü longkak aitiba sülen ketdangsur kati yangji aliba radio FM100 dang ashiba agi, police mali asübo yimti maziüoktetla.

Police tem mapai meyipa ogo aser tensa kanga mejungi lir, ta United States embassy ajanga ashi.

Mashi mapang tensa melenshitsü akok aser linük tesem kar nung lendong atalokba osang lir, ta embassy ajanga ashi.

Australia Ato Kilonser Anthony Albanese-ia linük indang high commission-i tensa asadanger aser Papua New Guinea nungi teyari meshia mali, ta ashi.

Iba linük nungya taoba mapanga azüdokshia rongrongshirong adokdang police temi maziüoktetli timtema liasü.

PELABA MOLUNGNEN O



ASOBA:
31st Aug 1953

ASÜBA:
7th Jan 2024

Onoki teti meima aliba Tzüürabur asür **RONGSENLEMLA TZUDIR** (Yimjenkimong) mapang tatsüka shiranga lir iba aima nungi pilaba mapang kinungertem aser adianutem molungzürep tia nung alidang, aser talisa Dimapur nung ojala sür tasümgang Naronikum, Longnak tashi bener aodang yimeryimsanger, tembaritem, temeimertem, Arogo aser lokti balala kwinkati nübu, rongsen aser sarasadem agi yaritepogo nenok ajak dangi tsüngtong arua pelaba meshitet nung iba zülü ajanga kangasa pelarani ta ajak dang metetdaksür, Tsüngremi moajangma. Nenok temeim mapa onok molung nung teti alitsü.

- Chirnurtem, Anükapang, Semchirtem aser kinungertem

UN court nung Israel anema ken o jembir

Hague, Aenjeti/January 11 (Agencies): Israel-i Gaza nung Palestine nunger ajunga samatsütsü meranger ta South Africa-i tai tonglokja ken o benokba UN indang International Court of Justice nung jembir.

Iba ken o nungsa Israel mitkari yangji operation agiba anentsü totuyuba agüjang ta asüngdanga lir.

Kin ajunga samatsü ta tai tongloktsüba atema ICJ yagi par tangatetba dang lemsateptsü, kechiaser ibai criminal trial ka masü.

Israel-i iba taitsüba ya tamendak dak maka tashia magizüker.

Brehostibarnü ICJ indang

Peace Palace kimalen ain adoktepba liasü, kong Dutch police temi Palestine aser Israel bhukumertem telok balala bendangtsü meranga liasü.

ICJ kima Palestine nunger nisan ayiptena nisung noklang aika adenshi aser ceasefire khanga liasü. Israel bhukumer temia screen ka amenoka Gaza nung tang tashi pua alir kar indang noksa sayua liasü.

South Africa-i ken o ya Brehostibarnü benoktsü aser Israel-i Hokulbarnü par temeden bushia jembitsü.

South Africa-i ken o benokba nung Israel-i Palestine linük, kin aser ethical group samatsütsü nükjidong

nung inyaker ta ashir. Gaza nung Israel-i Palestine nunger tepseter, temang aser temulung yirutsür aser temang nung teraksa agütsütsüsa inyaker, ta ashir.

Israel-i Gaza nung mitkar maparen ajak densema tekeraba nung "provisional measures" agitsüla, ta ashir.

Israel-i Gaza nung par inyakyim bhukuma nokdaker aser October 7 nü Hamas teloki amakba nung telangzüba agütsür ta ashi, saka Brehostibarnü court nung jembidang, amakba agi kin mesamatsür ta kuli magütsür, ta South Africa indang Justice Minister Ronald Lamola-i ashi.

(Maneni tapak 8 nung...)

Office of the

Watsü Mungdang

Hq: Mokokchung, Nagaland
Regd.EDS/GSS/70/84-85 Dated 08-04-1986

KONANG TETUSHI AGÜTSÜR

Watsü Mungdangi item nem konang tetushi agutsur:-

- 1) Wt. Yarenjungla Longkumer Judicial officer, Gauhati High Court nung Judge asütsü Naga nunger rongnungi iba jenjang mezüing ajangzüktetba asoshi kanga pelar aser Tsüngrem tenüng asanger.
- 2) Wt. Tiakala Ao mezüingbuba Nagaland nungi Chief General Manager (CGM) temaba jenjang (NABARD) nung ajangzüktetba asoshi kanga pelar aser Tsüngrem tenüng asanger.

Iba ama mezüingbuba aser tematiba jenjang ajangzüktetba ajanga Naga nunger ajungketsüba den asen kin nema tenüng tajung bener arutsür. Iba asoshi Kanga pelaba Watsü Mungdang ajanga metetdaksür. Tsüngremi nena taküm tali wazüka yujang ta Watsü Mungdang sarasadem.

Sd/-
Wt S. Arenla Longkumer
President
Watsü Mungdang

Sd/-
Wt Sungtiriben
General Secretary
Watsü Mungdang

Wushu technical training tembangogo



Trainees aser course instructors tem Kohima nung Brehostibarnü tangokba noksa nung angur.

Kohima, Aenjeti/January 11 (TYO): Wushu technical training Brehostibarnü Nagaland Olympic Association office complex, Koima nung tembangogo.

Nagaland kübok district 11 nungi trainees 11-i course tembanga agiogo. Technical training atema shisalen sayurji Manipur nungi International Wushu Federation (IWUF) Judge Dr. Moirangthem Iboomcha aser Arjuna Awardee Mayanglambam Bimoljit Singh na liasü.

Anogo asem training agiba mapang Taolo aser Sanda discipline ayinjema agiogo aser training nung shilem agirtem

nem Nagaland Olympic asayaba mapang Wushu asaya achaayangtsü atema qualified certificate agütsüogo.

Technical training tembangba sentong nung Manipur Olympic Association executive züngsem N Ibungochoubi-i, trainees tem nem certificates agüja liasü.

Course instructor aser Arjuna Awardee Mayanglambam Bimoljit Singh-i ashiba agi, state nung Wushu asaya renlokyonga aotsü atema lenmang sadema lapoka lir. Paisa, association-i asaya ajungkettsü merangba mapang asayartemi junga asayartetra

Nagaland-i medal angutsü timla lir, ta ashi.

Kasa mapang nung NWA General Secretary Akhozo-i trainees tem nem tenüngsang agütsü aser taruba Nagaland Olympic Games nung tetsükdaktsütema aika ajangshitsü ako ta ashi. Paisa, asayar tajungibattem asayatsü imlaba aser referee inyakyim tajungba aser telemtetba tajung agitsü imlaba lemsatapa liasü.

State sorkari asaya balala ajungkettsü meranga arudar aser association-a state nung Wushu asaya ajungkettsü atema bendanga agütsür lir, ta paisa shisem.

Zagreb Open: Aman Sehwat-i gold medal nguogo



Aenjeti/January 11, 2024 (Agencies): India nunger wrestler Aman Sehwat-i Zagreb Open Ranking Series tournament nung China nunger world No. 7 Wanhao Zou 10-0 agi koka gold medal nguogo.

Bodhbar aonung Sehwat-i asaya amokbanger asaya-a takok tajung ngutetba ya India nunger wrestler tem atema tajungshiba ka lir, kechiyong India nung ta Wrestling

federation suspend sütsüba den tanga mepetmesü aika adoker aliba ajanga asayartem kanga timtemtepa arudar.

India team tang asayamung balala nung United World Wrestling (UWW) banner kübok asayadar, kechiyong Wrestling Federation of India (WFI)-i election mapang shitak nung ayongzüka magiba atema parnok alima nung iba asaya achaayangba lokti tentet

tongtibai suspend sütsür lir.

Aman-i iba asayamung nung mezüngbuba asaya nung Turkey nunger asayar Muhammet Karavus 15-4 agi koka liasü.

Iba sülen Hangzhou Asian Games nung bronze medal ngur alisang yagi America nunger asayar Richards Zane Raye Rhodes technical superiority (11-0) agi koka semifinal-i ai.

Semifinal nung Aman-i Georgia nunger asayar Roberti Dingashvili, 11-0 agi ayong ayonga koka liasü.

Kasa mapang nung Asian Games silver aser Commonwealth Games gold medallist freestyle grappler Deepak Punia bo 86kg category asaya mezüngbuba round nung Kazakhstan nunger asayar Azamat Dauletbekov-i tsükdaktsü.

Repechage round nung pai bout kabo akok ajisüaka tanungba bout ana mekoki tsükatok.

Free Movement Regime...

Aser Naga nungeri India sorkar dak tamang makatetba tamendak dak ka asütsü.

Manipur nung mepetmemsü adokba ajanga state aser region nung nüburtem tamang-teimla samar tanaben shia arutsü teimla mongui lir. Manipur Chief Minister-i pa asoshi FMR

ya agiennüa alitsü südi, saka yamaji inyakba ajanga Naga nunger ang maneni akoksatsü, ta ashi.

Naga nunger aser Northeast ya India indang Act East Policy nung tongtipang shilem ka lir, aser Free Movement Regime agreement senzükayutsüba ya

(Tapak 1 nungi...) national policy anema inyaker asütsü.

Anungji Global Naga Forum ajanga ato kilonser aser Home Minister dang maneni Myanmar den yanglua aliba Free Movement Regime agreement wazüka ayutsü ajungshir, ta sangdong ajangasa ashi.

Asia Qualifiers: Rhythm Sangwan-i bronze medal angu

Aenjeti/January 11, 2024 (Agencies): Jakarta nung tang asaya aliba Asia Qualifiers nung Brehostibarnü 25m sports pistol event nung bronze medal anguba sülen Rhythm Sangwan ya India nunger shooter tem rongnungi Paris Olympic quota ka anguba asayar 16buba kümogo.

Rhythm qualify asüba sülen India team-i Olympics ka asoshi tang quota timtiba ngutetogo. Iba masü dang India team-i 2020 Tokyo Olympics asoshi quota 15 nguteter liasü, koba ajak dang timtiba liasü.

Esha Singh aser Varun Tomar nati Hombarnü tetsür aser tebur 10m air pistol asaya nung quota kaka anguba sülen India team nungi asayartemi iba asayamung nung Olympics quota asem buba ngutetogo.

Arishi küm 20 tain Rhythm, shiba Haryana nungi lir, la ya taoba küm Esha aser Manu Bhaker na den Hangzhou Asian

Games nung 25m sports pistol gold anguba team nung densema liasü aser lai final nung point 28 ngua bronze medal nguogo.

Ajsüaka linük atema Paris quota ka angutsü asoshi bronze medal angubaji teperi liasü.

Iba asaya nung China tsür Yang Jiin-i point 41 ngua gold medal angu aser Korea tsür Kim Yeji-i (32) silver medal ngua liasü.

Asian Olympic Qualifiers nung Rhythm-i medal asem tashi nguogo. Lai Hombarnü 10m air pistol event nunga bronze angu aser Arjun Singh Cheema dn külemi 10m air pistol mixed team event nung silver medal ngua liasü.

Hombarnü 10m air pistol asaya nung Pakistan tsür Kishmala Talat-i la ajateta silver medal anguba sülen Rhythm-i Olympic quota monguteti liasü ajisüaka lai Brehostibarnü quota ngutetogo.

Mokokchung-Chare lenmang... (Tapak 1 nungi...)

Aluyimer aser jana indokba mapa nung aliba MMC sanitation truck senzütsü atema Hombarnü nungi Honibarnü tashi anüngdang 11:00-12:30 ako tsüngta aser nikongdang 3:00 ako nungi 4:30 ako tashi lapoktsü.

Iba lenmang amshirtem/ lenmang nung senzürtem kumzüka ayutsü asoshi company ajanga iba lenmang nung traffic junga ketdangtsütsü.

Iba mapa inyakba mapang Company-i The Explosives Act/ Rule, 2008 nung tapet ozüngtem

(Tapak 1 nungi...)

sülen anidaktsüla. Iba mapa inyakdang takum aser ki o jen raksatsüra Company khuret asütsü, ta sangdong ajanga ashi.

Maneni Mokokchung-Tuensang lenmang nung senzürtem dang tang aliba NH-02 (Mokokchung nungi Tsutsung-Moalenden-Meyilong ajanga Chari tashi aoba) lenmang aser Mokokchung-Chuchuyimpang-Longmisa-Alisopur-Trongar-NH 02-Tuensang lenmang amshitsü ajungshir, ta DC Mokokchung ajangasa ashi.

UN court nung Israel... (Tapak 7 nungi...)

International Court of Justice ya United Nations indang tematiba court lir aser ibai Netherlands nung aliba Hague nung amenoka lir. Iba obendang ya theory tsütsü ICJ züngsem ajanga asoshi lir, kong Israel aser South Africa dena lir, saka mapa kuma meinyakteter.

2022 küm iba court yagi Russia dang tekeraba nung Ukraine nung military operations anentsü totuyuba agütsü saka yamaji meinyak.

International Criminal Court (ICC) ama masü, ICH yagi mapa tamajung inyaker nem temerenshi magütsüteter, saka paroki angatetba ya UN aser danga international tentet nung kongshir.

Hamas-i October 7 nü southern Israel amakba sülen

Gaza nung nisung 23,350 tepsetogo, ta Hamas meyong health ministry ajanga ashir.

Israel-i Gaza amakba ken o The Hague nung jembidang central Gaza nung Maghazi camp anasa Hamas züngsem ter tepset ta Israel indang air force ajanga ashi.

Kasa mapang Israel-i Deir el-Balah, central Gaza nung Al-Aqsa Martyrs' Hospital nung bomb pokloktsü aser mapang nisung ti asü. Palestine Red Crescent nungia nisung pezü tepset.

Ano occupied West Bank nunga Israel sepaitemi Palestine nunger nisung 28 pua October 7 nungi tang tashinung apur nisung 5,810 jungogo, ta Palestinian Prisoner's Society ajanga ashi.

BILEMDANGANG

"Takum nung talenba malir temi tesunep shimer."